



Орган Лемковского Союза.

Выходит в каждый четверг.

Редакция и администрация в Крынице. — Адрес „Лемко” Крыница.

Всіх читателей, котры не вплатили ище пренумераты, просиме выровнати якнайскорше рахунки.

Ище ест на складі **Календар „Лемка”** на 1936-ый рок.

Ціна одного календара выносит **50 гр.** При замовленях 10 календарей оплату почтову платит редакция.

Як село отчуло обнижку цін.

В послідных часах росшла ся радостна вість, же ціны промышленных товаров мусят быти обнижены. Населенє сел радовало ся, же Правительство хоче ульжити особливо господарам, бо за свои продукты зможут набыти того, што до тепер было для сельского газды за дороге.

Тымчасом ціны совсем не упали и приписы предвиджены Правительством в справі цін промышленных товаров от 1. січня т. р. не вошли в житє. Возме нпр. желізо, котре мало подешевіти о 10%, але если хоче ся купити, то треба платити давну ціну. Купуючий домагат ся, же желізо подешевіло, а купец звідуює ся, где таке чул. — „Ано, читал я в газеті”. — „То най вам продаст газета” отвічат купец и ціны не обнижат. Тото само ест при купні смаров, а ціна одеджи не лем не понижила ся, але ище поднесла ся.

Обниженє ціны соли о 4 гроши не тычит ся хлопа, бо хлоп т. зв. соли вареной не куповал и днеска помимо обниження ціны на 32 гр. куповати ей не може, бо в отношеню до цін продуктов рольных ест она за дорога.

Дальше треба бы также упомянути о знесеню торгового, рогаткого, ратичного и т. д. Здавало ся, же оплаты злучены с вїздом до міста сут знесены. Тымчасом ест иначе. Зносит ся одны, а накладывают ся другы высши. Во многих містах позношено оплаты торговли, котры ся платило в дні торговли. Оплата тота выносила праві по всіх містах от 15—20 грошей от фуры. Тепер знесено тоты оплаты и жадне місто не бере „торгового” бо тото ест декретом П. Презыдента знесене, але за то бере ся так зване „постойове”, котре поберат ся не лем в торгы, але каждого дня. „Постойове” платит ся

во многих містах не лем от фур, але также от гусей, кур, качок, свиней и живины рогатой.

С того видно, же ся не дуже змінило, и хлопы ходят маркотны и шемрют, же Правительство собі, а спекулянты собі. Ци ж не можна найти способов, штобы так спекулянтов, як и заряды тых міст, котры обходят законы и зарядженя Правительства, примусити до перестеріганя выданных приписов и законов?

Заказ продажи и ношения білого оружия.

Предсказане зарядженє министров: внутренних діл, войны, а также промысла и торговли о білом оружии и о ограничених торговли оружием оголошено уж урядово.

Заказує оно носити без позволения властей: 1) біле оружие всякого рода, скрыте в предметах не мающих выгяду оружия (в кях, парасолях и т. д.) 2) палкы гнучкы (гумовы, пружинны, скоряны и т. д.) заосмотрены в оконченє с тяжкого и твердого материяла, або містячих в собі вклады с такого материяла (кастеты) 3) металевы боксеры всякого рода и кольчасты пальцевы обручи, заосмотрены в гузы, реберка и т. д. 4) шаблі, шпады, багнеты, лянцы и пикы 5) всякого рода штылеты и ножи о долготі остря понад 10 см, твердо осаджены на черенку и остро окончены 6) ножи складаны о долготі остря понад 10 см, заосмотрены в приряд, удержуючий их по открытю твердо на черенку и остро окончены.

Постановленя о ножах не обнимают: 1) корделясы (ножи ловецкы) перезначены

до цілей ловецкых для людей посідающих ловецкы карты, 2) такы роды ножей, штылетов и т. п., котрых ся уживат до цілей фаховых в часі выполнения фаховой работы.

Понадто зарядженє заказує продавати слідуючи роды оружия: 1) всякы роды оружия, скрыты в предметах не мающих выгяду оружия, 2) всякого рода пистолеты с футералами служачима, яко кольбы, або с додатковом кольбом, 3) біле оружие, выше вычислене под 2 и 3.

Зарядженє входит в житє 12. марта 1936 р.

Убийцы короля Александра засужены на тяжкы работы.

Во Франции отбыл ся процес против хорватским терорыстам, оскарженным о соучастє в убийстві югославского короля, Александра, котре мало місце в минувшом року, коли король Александер приїхал до франции.

Як знаме убито втотчас короля Александра и французского министра заграничных діл, Барту. Головного преступника-убийцу, котрый стрілял до короля, убито на місци, трох дальших терорыстов участничих в нападі поймано и тых тепер суд засудил на безтерминны тяжкы работы. Остало ище трох, котрых участь была на суді доказаңа, але котры укрывают ся до тепер. Тых трох суд засудил заочно, што ведля французского права ровнат ся карі смерти.

Сніжны бурі в ріжных краях Европы.

Шаліючи в минувшом тыждні в ріжных краях бурі и задуякы потягнули за собою десятки жертв.

В Болгарии згинуло до тепер 84 людей, але тото число не обнимат всіх жертв,

Пренумерата в краю:
30 грошей місячно,
80 „ квартално
1:50 „ полрочно,
3 зл. рочно.

В Амерыці: 1 дол. рочно.

В Чехословакии:
2 кор. місячно, 10 кор. полрочно,
20 кор. рочно.

Ціны оголошень:
Ціла сторона 120 зл., $\frac{1}{2}$ стороны 60 зл., $\frac{1}{4}$ стороны 35 зл.,
 $\frac{1}{8}$ стор. 20 зл., $\frac{1}{16}$ стор. 10 зл.;
оголошения малы за 1 мм. 20 гр.,
в тексті 80 гр., перед текстом
40 гр. При місячном и долшом
оголошеню значна знижка.

Кonto чековe Нр. 404.155.

В Трации жертвом сніжної бурі пало 38 людей.

На морях Азовском и Чорном шаліла буря и задуювка. Численны кораблі совітскы нашли ся в поважнй опасности; на помоч vysлано ледоколы.

В Турции в часі курявы замерзло 48 людей, утопило ся 22, а 8-ро згинуло с инших причин. Желізнодорожна комуникация медже Стамбулом и Шмиром была перервана.

В Полночнй Греции в часі сніжнй бурі згинуло кильканадцетеро люда.

На Атлянтку у берегов Португалии в часі шаліючой бурі затонула ціла фльотыля рыбацка, занята ловльом сардынок. 27 рыбаков утопило ся.



Што буде дальше с войном в Афрыці? Чом так поволи? Близкий конец, ци далекий?

Война в Афрыці починат уж нудити. Розуміє ся, же ани италиянам в Абисыни, ани самым абисынцам не єст нудно. Але людям, росшмареным по ріжних закутинах цілого світа напавду нудит ся, заглядаючи каждого дня до газеты и не находячи там нич нового и важного.

На початку войны выдавало ся читателям газет, же начинат ся не бодайке воєнне видовиско. Знаменито заосмотрены италияны будут зражати ся со страшныма войнами короля королей, а мы будеме каждого дня читати о величезных боях и ставяти ся, што кого побідит.

Тымчасом уж 4 місяцы от часу начатя войны, а до тепер нияких великих боєв не было. На початку италияны заняли праві без боєв пограничный пас Абисынии на полночи, пак посунули ся под Макале и на том конец. Идут — правда — малы бои, Ту займут италияны якуси місцевость, там отопрут их абисынцы, идут бои передных сторожей, налеты италиянских самолетов с бомбами, ночны напады абисынцов, але боя великого, в котром приняли бы участь головны силы обох армии, не было.

До такого боя не хотят допустити абисынцы, котры маот ся где цофати и маот досыть часу. Они втягают поволи италиянску армию в глубину краю, штобы их таким способом ослабити. Таке заглупленє ся в глубину краю змушат италиянов до ростігання своих сил, до обсаджання своих задов, до роблення дорог через гористый край абисынскый и утруднят довоз провиянтов и воєнного материяла. Тымчасом абисынцы спроваджают оружие, штобы вооружити ціле населенє и аж коли обчислят они, же маот виды на побіду, приймут рішительный бой. До того однак дойде не скоро. Здає ся, же аж на час послідный отложено там сильны бои. А заносит ся, же война тотя продолжит ся. Єст то война на продержанє. Дуже в такой войні зависит от вытревалости и от грошей. Ци италияны здобудут ся на таку вытревалость и величезны грошевы выдатки — не відомо и прото невідомо также, кто побідит в той войні.



Против варварским методам при убою звірят.

Знаме всі, же жидаы ідят лем т. зв. „кошерне” мясо. Ведля них кошерне мясо

має ся втотчас, коли звіря ріже ся под горлом без попередного оглушеня звіряти. Понадто кошерне мясо може быти лем с передней части, а зады уважаны сут жидами за „трефны”. Таке убиванє звірят на способ жидовскый называт ся убоєм ритуальным.

Велике порушенє серед жидов выкликало предложенє в Сеймі посла Янины Присторовой, котра домагат ся знесеня ритуального убоя в Польщі, яко такого, котрый задає великы муки звірятам и через котрый часто нежиды поносят втрату. Треба зазначити, же тепер всі звірята (кроме свиной) убиват ся способом ритуальным и то без взгляда на то, ци мясо єст перещенє для населеня християнского, ци жидов. Посел Янина Присторова жадає, штобы в будущем всі звірята убивано так, штобы их передом сильным ударом в чело оглушено, а пак аж різано.

Через таке оглушенє звіря не терпит так долго, бо боль чує лем до часу оглушеня. Проектодательница доказує дальше, же через знесенє ритуального убоя ціна живины поднесе ся, бо каждый різник буде сам мог куповати и різати звірята (до тепер все мусіл быти в сполці жид, котрый брал кошерне мясо) и обнижат ся убойняны оплаты, котры поберали при убоях ритуальных або ритуальный різник, або ритуальны громады.

Внесенє того выкликало серед жидов страшный крик, же нарушат ся им религию. На тот крик поднесеный жидами и рабинами, котры зарядили молитвы на цілом світі о задержанє ритуального убоя, посел Янина Пристор заявила, же не ходит ту о религию, бо оглушаны маот быти также и свині. Дальше заявила она, же не право єст ужите против религии, але сут усилия ужити религию против права, бо ціле нежидовске населенє розуміє тоту справу добре и заявило ся за знесенєм варварских и мучачих способов при убою зсірят.



Ошусты вербуют людей на виїзд до Афрыкы.

На окраинах восточных грасує шайка агентов, котры розвивают нелегальну акцию вербункову на мнимый виїзд до Альгера, Туниса и Марокка в Афрыці.

Ошусты, штобы внушити ку собі довірє, оповідают селянам, же вправді емиграцийны власти с близше незнанных причин не выдають позволенє на виїзд кандыдатам религии православной, але незадолго, ведля „певных вістей”, якы они маот, власти позволят выїзджати до Афрыкы.

От легковірных „кандыдатов” поберают ошусты досить высокы оплаты тытулом „вписового” и вылуджуют гроши на мнимы кошты, звязаны с уладженєм формальностей при выробленю документов подорожи.

Понеже ціла тотя акция єст обчислена на вызыск и розсіванє неправдивых информации, прото Емиграцийный Синдыкат перещерігат всіх заинтересованных виїздом — перед ошустами.

В ділах виїзда на емиграцию и одержання бесплатных информации и порад належит звертати ся выключно до Централі Синдыката Емиграцийного в Варшаві ул. Круля Альберта I-го Нр. 7., або до Отділов Емигр. Синдыката на провинции.



Як жие бывший организатор красной армии, Лев Троцкий.

В Норвегии недалеко Осло, на одном домі єст прибита табличка с написом: „Людовик Гансон, купец”. Кто однак обсервує трыбжита властителя того дома, скоро нереконат ся, же властитель не занимат ся купецтвом.

Тым „Людовиком Гансоном” єст никто другой, лем Лев Троцкий, найблизший товариш Ленина, перший комисар заграничных діл совітской России, а погодивше комисар войны и организатор красной армии,

Засудженный в р. 1928. Сталином „за оппозицию и контрреволюционизм” на ссылку, утек по рокови с Сыбири и глядал азыля в державах европейских. Осіл на короткый час на малом острові под Цареградом, аж наконец приняла его Норвегия.

В купленном за 250.000 зл. домі осіл Лев Троцкий, а норвескы власти вписали его, яко Людовика Гансона. Троцкий держит у себе 4-ох детективов, котры стережут его, бо чорт не спит, а Троцкому не бракує врагов так серед комунистов, як и емигрантов.

С чого жие Лев Троцкий? Тыт, напевно не с того, што достал по отцу Давиді Бронштейні, маломісточковом аптыкарі на Украині. Также Правительство совітске не платит ему пенсии. Его врагы голосят докучливо, же єст он на удержаню голендерского магната нафтового, Детердинга, котрый не терпит владітелей Кремля, але то то неправда.

Троцкий доробил ся на писательстві — именно в часі выселенчества. До недавна великы амерыканскы газеты платили ему по 8000 дол. за 1 артыкул, а книжки его, от котрых брал гонорал в высоті половины ціны екземплара — расходили ся в накладах полмиллионных.

Троцкий не выїде уж с Норвегии. Не через якийси семтымент до того народа або краю, але прото, же его жита уж не много, бо он має сухоты легких и почок.

Можна зрозуміти, якы чувства нуртуют в нем, — 56-літном чоловікі, коли заклинат лікарей, штобы своим знанєм продолжили его жите. Не о дуже — лем тилько, штобы старчило ему часу окончити свою послідну книжку: „мой тестамент”, на котру ждут уж амерыканскы издателі.



ТАКЫЙ СВІТ.

Нарікаме небораки на мизерны часы: А тыт часы все однакы, лем люды сут фрасы.

Скупы, хытры, самолюбы, без чести, без віры,

На друг-друга щирят зубы, як бы дикы звіры.

Честь и правда, любов, згода — днес пусты слова,

Така вышла в світі мода, нахальна — чортова...

Каждый лем в пінязі вірит, в богатстві потуга,

Ведля грошей світ тя мірит, а не по заслугах.

С помеж велькой массы людей труд найти чловека.

Што то буде, як то буде, што нас завтра чекат?...

Асафат Потыкач.



Длячого отрекли ся прадідного руского имени.

Ріжнѣ цыганства и дурачества пишут львовскы редакторы украинского „Нашого Лемка” а нич им так тяжко не приходит, як вытолковати рускому лемкови, чом он мал бы отречи ся свого прадідного руского имени, своей славной истории и переоначити ся в украинца.

Бо можна писати всякы цыганства о славѣ и силѣ украинского сеператизма, о японцах и англичанах, котры интересуют ся украинским „питанням”, о абисинцах, котры барз люблят наших украинцов — во всьо тото може наш лемко аж и повірити, бо тото всьо не видит, не переживат, одним словом, не може так легко сконтролювати и розумом оцінити. Но если скажете днеска зрілому лемкови, котрый має здоровый хлопский розум, што от днешного дня он має переоначити ся в украинца, змінити свою руску народность на украинску, мало того, если скажемо єму, што он от давна украинец, што діды-прадіды єго были и чувствовали себе украинцами, то он выбалушит (вытрещит) на вас очи и начне над тым роздумовати.

Недавно писали мы о том, як то якийсь український „учений” из Нашого Лемка” пояснял, длячого украинцы мусіли отречи ся руского имени. Гварил, што длятого, бо тото имя, язык и историю присвоили собі (украли) беззаконно москалі и длятого мы мусиме свою назву змінити. (Штоси так, як змінят ся замок от мешканя, як затратит ся ключ, або єго ктоси украде, — штобы пак не мог злодій тым ключом достати ся до мешканя.

В третом числі „Нашого Лемка” с 1. лютого 1936. находиме допись о. Николая Миланича, пароха из Мочар под заглавєм „Правдива история про село Щавник на Лемківщині”, в котрой медже другим пише он таке: „Давнійше за княжих, польских и австрийских часів звався (народ живучий в Щавнику и взагалі на Лемковщині) Русю, Червоною Русью, а тепер по сьвітовій війні міняє назву на українців, з ріжних оглядів більше для нього підходячу. Кожний західний нарід з бігом часу и поступу міняв свою назву: латини на римлян-уталійців, готи на герман и дайтше, ляхи на поляки і т. п. Чомуж тільки русини малиб стояти на місці?”

Вот вам рускы лемкы яке виходит!

Значит ся, то належит до поступу и длятого они тепер перезвали ся украинцами, за 50. літ може перезвут ся воляняками, а за дальших 50. літ мазепинцами, бо як поступ, то поступ.

Але писанина тота не лем смішна, але и ложна, цыганска.

Передовсем отец парох исторык, наводячи приміры из перед двох тысячей літ забывают, што и о нас всіх славянах можна сказати тосамо, бо и тоты племена, котры в передисторычных часах жили на наших землях звали ся „сарматами” а ище перше „сцитами”, але от часу, як пришли до той степени зрілости, што яко славяне, одны сут руснакы, другы полякы, чехы, сербы и т. д., то яка єст причина, штобы мы дальше міняли свои национальны назвы?

Забывают также парох-исторык, што тота зміна назвы лятинов на римлян, а пак на италійцов наступила не так собі для самого „поступу” для моды, для зміны фасона, але наступила по страшных исторычных потря-

сенях, які пережили всі народы, входячи в склад світової римской державы наслідком нашествия племен германских, а погодивше диких племен гунов, котры раз на все знищили світову римску державу, а на цілы столітя знищили римску культуру, и одним словом до горы ногами перевернули цілу Европу. В тых страшных часах гинули безповоротно не лем цілы державы, але цілы племена и народы пропадали безслідно. Прото и не дивно, што по лятинах пришли нсвы племена, новий народ, котрый принял назву итальску, но не можна нияк сказати, што был то тотсам народ, бо лем край-земля остала тота сама, а змінил ся народ, слідовательно змінила ся и єго назва.

А уж барз планно трафил отец-исторык на готов и герман, бо то таксамо як бы хтоси сказав: чехы змінили назву на славян: бо именно готы, то лем одно из германских племен, так як чехы, то лем оден из славянских народов, а назва герман также означала все цілу групу народов европейских, до котрых належат днешны: німцы, шведы, фрызы, норвежцы и англо-сасы. И если німцы звали себе также и германами, то лем таксамо як сербы, чехы, полякы и другы признают ся до того, што сут славянами.

Помішали вы отче-исторык и понятя и назвы цілых груп племенных и народов и не застановили вы ся над тым, же с научной стороны выйде с того лем сміх.

Врешті пише парох-исторык, што ляхы змінили назву на поляков.

Уж не лем человек интеллигентный, але послідный неук знає, што полякы сами николи не звали себе ляхами. Перший літописец наш Нестор называт ляхами славянскы племена над Вислом и Одром, но поза тым назвы той не встрічат ся ни у исторыков западных ни восточных. И если сусіды, а особенно мы руснакы уживали даколи на означенє поляков назвы „ляхы” то лем в значеню ворожом, недоброжелательном, иначе говорячи прозывали поляков ляхами.

Тож виходит отче-исторык, што аргументы ваши лем так на перший погляд трафны, но в річі самой фалшивы и без научного основаня.

Бо длячого то баварцы, стырийцы и прусаки не перестают себе звати німцами (дайтше) и не выдумуют нации баварской, стырийской, пруской?

Длячого польскы мазуры або кашубы не оставляют своей прадідной назвы и не глядуют новой?

Длячого то они не такы поступовы як наши украинцы?

А ци имя, взгядно назва якогоси народа то так як капелюх, порткы або сердак, котрый можна змінити стосовно до моды и поступа?

Преця имя народне звязане так тісно с даьным народом, як душа с тілом. Як не можна души отлучити от тіла и всадити якуси нову душу в тото само тіло, так не можна покыдати народного имени, освяченого кровю и трудом десятков поколіов наших предков, а глядати новой назвы.

Старали ся німцы и медже поляками найти отступников и готовили ся на Шлеску сотворити нацию шлезаків, а над балтийским морем сотворити нацию мазурску.

Нашли уж и медже поляками редакторов для шлезакских и мазурских газет, нашли ся тоже и німецкы учены, котры почали уже творити историю для тых новых нации, лем на счастье медже самыма шлезакими и мазурами барз мало нашло ся таких, котрым сподобала ся тота нова мода, тот модерный „поступ” и не захотіли они міняти свого национального имени и ставати орудєм в руках німецкой интрыгы.



БОСЬКО — ПОВІТ СЯНОК.

Радуй ся и величай душо Величкы! Радуй ся душо украинска! Довершуєте Украини на крови и смертельных жертвах своих братьев. Не досыть вам жертв Талергофа и світової войны, воюєте дальше терором, злбом, саботажами, мордам и угрозом заганняте до свого украинского табора.

Примір того дають події с громады Босько пов. сяноцкво. До часу, коли был парохом в Боську пок. о. Вишневский, была медже народом згода. Перед килькома роками пришол до нас о. кат. Головач, пак о. Сальо, а по нем о. Величко и начала ся робота украинизации села. С проповідальниц єыпали ся слова про Украину. Каждая неділя приносила вірным ріжнѣ байкы в роді таких, же Христос пришол медже украинцов, же апостолы голосили слово Боже украинцам, же Володимір Великий, князь украинский крестил украинцов в Дніпрі и много, много инших, от котрых уха пухнут.

Поза церквом ігомосці наганяли до свого табора через гостинкы для селян в своей хаті, через свячену воду, коляду, а найбільше черз своих наганячей, котры за чарку горілки и картофляны шныцлі ишли в село дурити. И довели людей до звады, биткы и авантур, котры не устают в селі.

Дня 2 лютого устроили наши люды просфору в приватном поміщеню. Єст в селі дом с сальом, выбудованный за громадскы гроши, але там не нашло ся місце для „кацапів”. Комитет попросил о. Величку о посвяченє просфоры, але тот отвітил у себе в хаті, а потом в церкви, же не приде, бо там буде авантура, ци непорозумленє. (Интересно, откаль вы отче уж передом знали, што там буде непорозумленє?)

На просфору пришло понад 100 гостей. Просфору посвятил о. Професор Секежинский с Сянока. Интелигенции явило ся около 20 и всьо отбывало ся красно. Промовляло много гостей; співали коляды и рускы пісні. Аж о год. 3-ой начали метати каменями (передом метали піском в окна) до хаты, и співати: „не пора москалеви и ляхови служити”, хотячи тым спровоковати авантуру. До авантуристов вышли члены комитета и завоzwали их до заперестаня авантуры. В тотчас авантуристы шмарили ся на комитетовых и побии тяжко 66-літнього Василя Романа и єго сына. В авантурі принимали участь громадскы радны: Антоний Теплий, Николай Теплый и килькох других.

То сут результаты украинской роботы украинских священников, котры уж от дітины вщеплюют людям ненависть. Повыше описанный случай нехай буде для наших церковных властей доказом ширеня християнской любви через украинских священников, а для наших людей науком и пересторогом перед того рода священниками, котры тепер увіряют всіх, же в Талергофі сідили украинцы, а як, не дай Бог, вспыхнула бы война, то напевно выдадут неодного на шибеницу и неоден застогне и неодна мати и родина заплаче!

Сусід.

Што чути в світі.

Вашингтон: Президент Рузвельт переслал до президента Аргентини писмо, в котром пропонує скликати конференцію всіх американських держав. Ціль той конференції має бути забезпечення мира медже американськими республіками.

Нью-Йорк. Американське правительство рішило депортувати со Сполучених Держав Полн. Америкы всіх чужих граждан, котрых засудили американськы сулы на кару понад 10 літ тюрмы. Таким способом Европа достане прекрасний подарунок, зложеной с перешло 500 преступников. Преступников перевезе ся на нарочном кораблі, котрый буде об'їзджати поодиноки державы и высаджати на сушу их граждан. Корабель буде експортований через корабель торпедовый.

Нью-Йорк: В Сполучених Державах маюť выбудувати 2 новы океаничны великаны о вмістимости 100.000 тонн каждый с помещенем на 10.000 людей. (Дотеперешный наибольший корабель пассажерский „Кеен Мери“ має 72.000 тонн). Пароход тот должины 375 метров, ширины 43 метры, має плынути со скоростью 70 км. на годину и має коштувати по 50 миллионов долларов каждый. Пароходы будут мати лем одну клясу, притом кошты переїзда будут выносити 50 до 60 дол. без удержаня. Пассажиры будут могли їсти в нарочных реставрациях по доступных цінах.

Вашингтон: Сенатор Бораг с республиканской партии принял кандидатуру на президента Сполучених Держав Полноч. Америкы.

Білград: В югославском парламенти дошло в часі бюджетной дебати до битки. На членов правительственной партии шмарили ся послы оппозиции и начали битку. Одного посла ранили. Засіданє парламента отложено на тыждень.

Парыж: Англия має выступити в Римі с новым предложением мира в конфликте италянско-абисынском. Если Италия не згодит ся на пертрактации, то Англия рішит ся старати о ухвалу Лиги Народов, уповажняючи до активного выступлєня против Италии в обороні Абисинии.

Асмара: Итальянскы газеты подают, же их войска отнесли велику побіду коло Макале. С 80 тысяч абисынских войск 30 тысяч находит ся в неладі. Гора Арадам опанована. Абисынскы втраты великы. 20 тысяч люда утратило боепоспособность. Втраты итальянскы маюť выносити около 400 убитых и 500 раненых. Абисынцы 12 раз порывали ся до агакы. В часі боя итальянскы летчики безперерывно бомбардовали ворога.

Ница: Король румунский Кароль, жиючи тепер в Ницы заявил, же без взгляда на то, што ся стане, армия румунская найде ся все на стороні армии французской.

Прага: В часі бюджетной дискуссии в чешском Сеймі референт, посол Ремеш ствердил, же за час 5-ох літ т. є. от 1930 до 1935

бюджетный дефицит выносит 6 миллиардов 100 миллионов корон чешских.

Наміреном подорожом Литвинова до Токио интересуют ся живо всі світовы газеты. Тот подорож єст знаком, же так Совіты, як и Япония не хотят допустити до выбуху войны советско-японской.

Харбин: Медже войсками внішней Монголии и манджурско-японськими дошло знова до конфликта. Монгольскы войска заатаковали на самоходах панцерных отділы японско-манджурскы, але по парогодинной борбі мусіли отступити.

Берлин: На штрєці Берлин-Гамбург отбыла ся пробна їзда електричного поїзда, зложеного с трох вагонов. Поїзд осягнул скорость 205 км. на годину.

Мадрид: В Испании отбыли ся выборы, котры принесли рішительну побіду лівой партии, во главі котрой стоит бывший премьер Азана. Его вычисляют уж тепер, яко будучого шефа правительства.

В Парагваю выбухла революция. Президент Парагвая, Агуаля утек со столицы. Революция повстала в армии. 4.000 демобилизованных вояков по войні с Боливиом обалило правительство. Войска вірны правительству поддали ся революционерам. Революционеры опановали столицу Парагвая Асунсион. Президент Агуаля зрек ся президентуры и революционеры прирекли єму, же не стане ся єму нич злого.

Вісти с краю.

Варшава: Министер заграничных діл г-н Бек выїде в найближшом часі на запрошенє бельгийского правительства с официальном визитом до Бруксєлі. Визита тота має послідовати 2-го марта.

Варшава: П. Президент Р. П. помиловал бывшего посла Д-ра Прагера, котрый был засуженый на кару ареста в процесі Брестком.

Варшава: Драматична сцена розигралась в тых днях в Пуці Біловеской. На спровадженого до пуці со Швеции расплодывого жубра, котрого куплено за 100 тысячей

злотых, шмарил ся старый жубр. Он перервал огороженє с грубых бельок и начала ся страшна борба, котра трєвала 11 годин. Не помогли струи студеной воды, котром зливано роз'юшены звіры, не помогло страшенє огнем. Аж острый запах запаленой сіркы розогнал воюющих быков. Новый жубр єст сильно пораненый.

Варшава: Премьер пруский Геринг приїхал до Польши на ловы до Біловеской Пуці.

Варшава: Новсменованный посол Чехословакии Д-р Юрий Слявик приїхал до Варшавы дня 17.11.

Фабрики гумовых вырєбов обчислили, же в послідном році продано т. зв. народного обуť, купованого через сельске населєнє о 40% меньше, як в ноці попередном.

Министер німецкий Д-р Франк по отбытых официальных ловах поїхал до Кракова и Закопаного.

Катовицы: Власти воєводства шлеского приступили до ликвидации тайной организации німецкой, котра от пару місяцов розвивала противзаконну діяльність на Горишнем Шлеску.

В неділю, дня 1. марта 1936 о год. 2-гой отбуде ся
в Андрєєвці в салі читальні
Обще Собранє
ЧЛЕНОВ ЧИТАЛЬНІ,
на котре дооколичну интеллигенцию
и всіх рускых людей запрашат
Виділ читальні.

Важне для нас всіх

В понеділок дня 3 марта о год 12.
в дому г-на Евстахия Милянйча в Мушині на рынку отбуде ся

основательне собранє

ГУРТОВНОГО КООПЕРАТЫВА

для сєл положєных вокруг Мушины.
Просит ся всіх войтов, солтысов, склепаров и свідомых людей прибыти численно на то то собранє. Реферат о кооперации выголосит г-н Яновицкий с Крыницы.

КТО ХОЧЕ ЗАБЕЗПЕЧИТИ СЕБЕ НА СТАРОСТЬ И РОДИНУ
ОТ НУЖДЫ И ГОЛОДА, АБО ЗЛОЖИТИ ДІТЯМ ВІНО,

НЕХАЙ ЯКНАЙСКОРШЕ

заасекурує ся
в асекurationsком Товаристві
Вита и Краковске
во **ЛВОВІ**

Асекурацию принимают на цілой Лемковщині
представителі: гг. Осиф Яновицкий — Крыница-Сєло и Михаил Перелом — Сянок.